

Relato di "Costumbernan rond di casamento na cuminsamento di Siglo 20 a keda cla

ORANJESTAD (AAN): Recientemente a keda finalisa e relato titula "Costumbernan rond di Casamento na cuminsamento di siglo 20". E relato ta un publicacion di Seccion di Investigacion di Archivo Nacional Aruba. Pa e investigacion a haci uzo di historia oral y e tin como meta pa haya mas conocimiento di e costumbernan rond di casamento manera nan tabata existi na cuminsamento di siglo 20 te añanan 30/40, bou e famianan Arubiano catolico.

A haci uzo di entrevistanan realisa den aña 1997 pa señora Lucia Kelly di e Seccion di Investigacion di Archivo Nacional Aruba y tambe di entrevistanan cu Departamento di Cultura y Educacion a realisa den e periodo 1967 pa 1973. Den e relato ta haya informacion y cifranan di casamento den

siglo 19 y cuminsamento di siglo 20, y di e diferente etapanan prome cu casamento: namoramento y compromiso y tambe e preparacionnan pa e dia di casamento. Tambe ta trata e dia di casamento mes: e casamento na misa y e celebracion na cas. Den e relato a laga mas tanto posibel e personanan entrevista na palabra. Di e forma aki e lesado ta topa tambe cu palabra y exprecionnan poco usa awendia.

Den e relato ta bin entre otro padilanti cu prome cu aña 1823 habitantenan di Aruba no por a casa pa gobierno riba nan propio isla.

Hendenan tabata mas custumbra cu e casamento pa misa. Te rond di 1880 mayoria mucha cu tabata nace, tabata di mayornan no casa cu otro pa gobierno. Despues di e tempo aki nos ta

cuminsa mira un cambio remarcabel y na 1939 e porcentahe di muchanan naci di mayornan no casa cu otro tabata 17%.

Tabata trata di un tempo unda normanan explicito y stricto tabata dirigi e diferente etapanan prome cu casamento. Aki nos ta referi entre otro na e bishitamento di cas durante e periodo di namoramento, e pidimento di man y e dunamento di un termino den e periodo di compromiso. E periodo di compromiso ta ensera cumplimento cu cierto palabracionnan y cu cierto expectativanan. Pa loke ta toca e mucha homber, esun mas principal tabata cu e ta cuminsa haci e preparacionnan pa yega na un propio cas den e tempo cu el a duna pa casa. E mucha muhe tin di cuminsa prepara su mes pa su tarea como casa y mama di un famia grandi. Tabata mira e matrimonio como algo pa semper. Conviccionnan di famia, bario y iglesia tabata pisa hopi riba e libertad di un persona pa actua segun su propio consenshi.

Cu construccion di e refineria di Arend Petroleum Maatschappij, conoci como Eagle y di refineria di Lago, cambionan di e costumbernan rond di casamento a cuminsa tuma luga. E bondansa economico tabatin su efectonan riba e periodo di namoramento y di compromiso. A cuminsa bin cambio den trahamento di cas y den e periodo cu e cas ta keda cla. Tambe a bin cambio den e celebracion tradicional.

E fiesta di casamento tradicional cu casamento riba burico, cu tocamento di fiyo of sonfonia di man y di comemento di sopi' bestia chikito cu pan bati, a cuminsa cambia. Y e fiestanan di bruid a cuminsa bira mas grandi y mas luhoso.

E desaroyo economico a cuminsa trece cambio tambe den influencia di e mayornan den scogemento di un partner. Cu miho ganamento di e mucha hombernan nan por a tuma un posicion mas independiente di nan mayornan.

E cambionan den e celebracion tradicional no a tuma luga pa motibo di e bondansa economico so, pero tambe pa motibo di influencianan di afo. A cuminsa por ehempel parti bolo na fiesta y a cuminsa invita cu carchi na luga di combida cu boca. Pero e cambionan riba tereno economico no a cambia tur cos. E hisamento di bandera dia di casamento a logra di

sobrepasa tur e cambionan riba tereno economico. Y como parti di e fiesta e comemento a keda algo hopi importante.

Tur esaki y hopi mas por lesa den e relato tocante Costumbernan rond di casamento na cuminsamento di siglo 20. E relato ta obtenibel na Archivo Nacional Aruba na Sabana Blanco 62, den e ex-edificio di Wimco.